

青盲不驚銃

有二 e5 和尚，一 e5 好額，一 e5 散。有一工，散和尚共好額和尚講：

「我想欲去南海？」

好額和尚聽一下驚一趔，目 tsiu1 展大粒講：

「你憑啥物去？」

散和尚講：

「我憑一支貯水的葫蘆、一塊貯飯的碗，就有夠矣。」

好額和尚講：

「你，你真正是青盲不驚銃！十外年來，我買船的錢猶款無夠，所以毋敢去。你干焦一支葫蘆、一塊碗，敢去？」

三年後，散和尚去南海轉來矣，好額和尚心內又閣欣羨，又閣見笑。

人啊，愛有青盲不驚銃的精神，想欲做的代誌，馬上做落去，千萬毋通當等條件有夠，才袂一等等一世人！